


FANKALAZANA NY NAHATERAHAN'NY TOMPO - B



Tonga nofo ny Teny ary nonina tety amintsika.

Ry Kristianina havana, an-kafaliana sy an-karavoana tokoa ny anolorana ny fiarahabana sy ny fiarian-tsoa ombam-bavaka ho antsika ao anatin'izao fankalazana ny Noely izao. Arahabaina isika oloaraiky jiaby tratin'izao Noely izao. Arahabaina isika EO MISIONERA VITA BATEMY IRAHINA HO TABERNAKLA VELONA. Matoa eto anivontsika i Jesoa amin'izao Noely izao dia satria hanavao ny zava-dretra nikorontana, hitondra aina sy fivelomana, raha isika olombelona tratra ny fahotana tamin'ny fototra ary voasariky ny fakam-panahy ka mifanapotika dia miantso antsika àry Izy Andriamanitra amin'izao Noely izao hanokatra ny fonsika handray an'i Jesoa eo amin'ny fiainantsika

mba ho ivon'ny fianantsika Izy, mba ho génération mpanorina tokoa isika sy ho mpandavorary, hitoetra ao Aminy tokoa isika ary Izy hitoetra amintsika dia hamokatra be isika ary ho feno ny hafaliantsika. Raha Izy mitoetra eo amintsika dia hamokatra be isika. Matoa ny fiainantsika izao tsy mamokatra dia satria tsy mitoetra ao amintsika i Kristy ilay Mesia tonga eto anivontsika.

Vakiteny I : Iz. 52, 7-10

Tononkira : Sal. 97, 1. 2-3ab. 3de4.

Vakiteny II : Heb. 1, 1-6

Evanjely : Jo. 1, 1-18

Ry Kristiana havana milaza miara-mahita isika fa maro ny zavatra robaka, simba noho ity covid 19 ity, efa iray taona isika izao no niatrika azy ity. Feno fanantenana isika teo ampiandohan'ity taona ity satria vao avy namangy antsika ny Papa François, Mpamafy Fiadanana sy Fanentana. Indrisy volana vitsy taty aoriana dia NIKORONTANA ny fiainantsika, KORONTANAVIRUS hoy isika.

Tsy Andriamanitra lavitra no Andriamanintsika ka tahaka ny namonjeny antsika tamintsika NOKORONTANIN'NY DEMONY tamin'ny fahotana tamin'ny fototra dia nampanantena ny Mpamonjy

izy. Tonga teto tokoa ny Mpamonjy rehefa nanao “Eny” i Masina Maria vokatry ny finoana. Natoron’l Masina Maria ny lalana. Aoka isika haka tahaka azy ka hanao “Eny” handraisantsika ny Mesia amin’izao fotoan-tsarotra izao. Tonga l Jesoa hanarina ny fifandraisantsika amin’ny lafiny manontolo : fifandraisana amin’ny zava-boahary, fifandraisantsika samy isika, fifandraisana amin’Andriamanitra. Io ny fihariana vaovao, lanitra vaovao, sy tany vaovao andrandraintsika. Sokafy ny fontsika handray an’l Jesoa dia ho Noely tokoa ny fiainantsika. Izay ny dikan’ny komonio raisintsika. Tsy komonio mikombona anefa satria tsy noely ho azy samirery no nahatongavan’l Jesoa fa ho an’ny rehetra. Manomboka tao amin’ny fianakaviana Masina mandalo amin’ny mpiandry ondry ka hatramin’ny Majy. Torak’izany koa irahina isika ho EOVS MISIONERA TABERNAKLA VELONA ka zary génération, taranaka Mpanorina.

Amin’izao fankalazana ny Noely ka hifanolorantsika ny firarian-tsoa sy fiarahabana izao àry mba tsy ho fety ety ivelany fotsiny fa indrindra ho antsika miatrika ny fiainana sarotra izao, dia aoka ho tahaka an’ireo mpiandry ondry isika ka hihazakazaka hiakatra ho an’ny Betlehema mba hahita an’izany famonjena izany eo anivon’ny fiainantsika. Mihazakazaka izay midika fa maika ka aoka isika rehetra amin’izao fotoana hankalazantsika ny Noely ka handraisantsika ny famonjena izao ho toy ireo mpiandry ondry nandray ny famonjena ka mba ho maika koa isika hanova ny fiainantsika hanatona an’i Kristy. Manaraka ny mihazakazaka dia miakatra ka mila misandratra ny fontsika. Mila misandratra ny fiainantsika fa tsy hirefarefa amin’ny tany. Amin’izay isika hahatsapa fa olo araiky ao amin’Andriamanitra satria nohariany hitovy endrika Aminy. Ny endrik’i Jesoa no hitantsika sy hitan’ireo mpiandry ondry tao Betlehema, nihazakazaka izy ireo hahita ny endrik’Andriamanitra. Aoka isika hahita ny endrik’Andriamanitra amin’ny fiainantsika dia tsy inona fa ny fitiavana, ny fahamarinana, ny fifanajana, ny fihavanana. Izany no ankalazaintsika amin’izao Noely izao. Mahita ny endrik’l Jesoa tokoa isika eo amin’ny fiainantsika satria niova ny fontsika. Tsy ny lojikan’izao tontolo izao intsony no manentana ny fiainantsika fa OLOM-PINOANA, OLOM-PANANTENANA, OLOM-PITIAVANA vokatry ny safidy ka miova tokoa ny fifandraisana amin’ny tontolo iainana, amin’ny tontolom-piainana, amin’ny fiaraha-monina, amin’ny tontolom-pinoana ka mifototra amin’ny fifanajana.

Ho antsika ny fankalazana dia ivelomana ka hivelona ny endrik’Andriamanitra isika, raha manatona ny “la crèche” isika ka mitsaoka azy dia tsy hoe manompo sampy amin’izany fa noho ny finoana dia ho hitantsika fa endrik’Andriamanitra tokoa no asehon’izany, izany hoe manosika antsika hahita ny endrik’Andriamanitra amin’ireo manodidina antsika. Raha mahita ny endrik’Andriamanitra isika dia hiova tokoa araky ny voalaza teo, ny fifandraisana fototra telo.

Ny fanompoan-tsampy tokoa dia manambara fa tsy mahita ny endrik’Andriamanitra, ary izany no miseho amin’izao andro iainantsika izao ka mahatonga izao KORONTANAVIRUS izao, noho ny adim-piainana dia maro amintsika ny mikatsaka sy mamorona Andriamanitra hafa ka lasa mandrodana isika toy izay manorina.

Amin’izao Noely izao, aoka isika tahaka ireo mpiandry ondry hihazakazaka hanatona an’i Jesoa, miaraka amin’ny Fanahy Masina izay hanokatra ny fontsika. Aoka ho ny mason’Andriamanitra no hijerentsika ny manodidina antsika, aoka ho ny vavan’Andriamanitra no hitenenantsika. Enga anie isika hanatona ny “la crèche” ka hahita ny endrik’Andriamanitra, izany hoe hahita fitiavana, fihavanana, fiadanana, hahita ny fahamarinana. Enga anie isika ho tahaka ireo mpiandry ondry eo anivon’ny fianakaviansika sy ny toerana rehetra misy antsika hahita ny endrik’Andriamanitra ka afaka hanambara an’izany endrik’Andriamanitra hitantsika izany amin’ireo manodidina antsika.

Ary hiainantsika izany endrik’Andriamanitra izany tahaka an’i Lucien Botovasoa izay raim-pianakaviana, sy ho tahaka an’l Victoire Rasoamanarivo izay renim-pianakaviana mba ho taranaka

mpanorina sy marina isika rehetra. Azontsika onona, azontsika tsara amin'izao ny mahatonga antsika naka ny foto-kevitra hanambarantsika ny “nouveau départ” ny fianakaviana “Eglizy kely” miara-mivavaka sy miara-mandalina ny finoana”. Azontsika tsara satria tena mifameno amin'ny foto-kevitra amin'izao telovolana faharoa amin'ny dingam-piainantsika izao.

Aoka isika ho tahaka an'i Masina Maria, hahay hitahiry ao am-pontsika ao fa tsy ho poerapoera, manaiky ny sitrapon'Andriamanitra sy manatanteraka azy.

Hanao “nouveau départ” tokoa isika araky ny teny fanevan'ny taona pastoraly iainantsika izao.

Ho Noely hitondra vokatra tsara anie ity noely ity. Aoka isika hitoetra ao amin'i Jesoa ary hitoerany ka hamokatra be, izany no irintsika vokatry ny Noely izao, hamokatra ny fiainantsika, hamokatra arapahy, ara-tsaina, ara-nofo ka ho lavitra antsika ny ratsy rehetra, ho lavitra ny fahasahiranana sy ny fahoriana rehetra isika raha tena génération mamokatra tokoa eo amin'ny fiainantsika. Ho vita tokoa ity KORONTANAVIRUS ka hiroso amin'ny lalindalina isika amin'ny maha EO MISIONERA TABERNAKLA VAOVAO. Raha génération tena manorina tokoa isika amin'ny ataontsika rehetra ka ho eo anivontsika ny aina ary eo anivontsika ny fahazavana, eo anivontsika ny tena fiainana sy ny fiadanana araky ny voalazan'i Md Joany amin'ny Evanjely androany *“Tamin'ny voalohany ny Teny, ary ny Teny dia tao amin'Andriamanitra, ary Andriamanitra ny Teny. Tao amin'Andriamanitra tamin'ny voalohany Izy, Izy no nahariana ny zavatra rehetra, ary raha tsy Izy, tsy nisy ary ny zavatra àry rehetra. Tao aminy ny fiainana, ary ny fiainana no fahazavan'ny olona. Ary mamirapiratra amin'ny maizina ny fahazavana, fa tsy nandray Azy ny maizina »*

Matoky isika araka izany ary efa averintsika matetika fa I JESOA TENIN'ANDRIAMANITRA NO TSY MAINTSY TOMPON'NY TENY FARANY FA TSY ITY KORONTANAVIRUS ITY. Manantena tokoa isika fa hivelona ny tena fiainana araky ny voalazan'izaia mpaminany amin'ny vakiteny voalohany ka hahita ny famonjen'Andriamanitra ny vazan-tany rehetra *“Nasehon'ny Tompo ny sandrin'ny fahamarinany, hiharihary eo imason'ny firenena rehetra. Ary ny faran'ny tany rehetra, hahita ny famonjen'ny Andriamanitsika.”*. Sambatra tokoa isika fa tonga hatraty amintsika Madagasikara ny famonjena, ary izay itoerany dia hamokatra be.

Enga anie mba ho tanteraka tokoa izany ry Kristianina havana, enga anie ho eo anivontsika tokoa ny fahazavan'i Kristy sy ny hafaliany ka ho zary fahazavana sy fanasina koa isika hahay hizara ny hafaliana eo anivon'ny manodidina antsika, eo anivon'ny fianakaviana Eglizy kely, eo anivon'ny fiaraha-monina ka ho eo anivon'ny fiadanana marina isika.

Masina Maria, Md Josefa mivavahà ho anay mba ho noely manambara “départ vaovao” tokoa ity noely ity. Taona natokana ho anao manokana ity taona vaovao ity ry Md Josefa araka ny voalazan'i Papa. Ianao no Ray Mpitaiza an'i Jesoa Mpiaro an'izao tontolo izao ka arovy izahay tsy ho potehin'ity KORONTANAVIRUS ity. Mivavahà ho an'ny Ray rehetra mba hanahaka anao fa mila Ray izao andro sarotra izao Amen

Mompera Arseveka Mgr Benjamin Ramaroson